

Bin rèpliké.

Gaston Lucy - Presse.annonces - 13 Mars 1974.

Dins l'timps, i gn'avot brâmint des ovrîs du p'tits mustîs ki fjint l'toûr des viadjes pou gangnî cate sous.

Insi, à Tchî-Planes, i gn'avot l'Crolé du Rousse. A l'atinde, i counichot tout du s'mustî, il astot cwam'jî, dijans, sav'tî putot, i r'limot les soyes, i s'dijot cotcheu (châtreur de porcelets), i tondot les bèrbis, i fjot des lotrîes avu des lapins, i pèlot ... dj' arètrans, i gn' è asséz insi...

I n'avint jamwês in sou al mājjon, i les stran.not à fwêt à bwâre des p'tites goutes. A vrê dîre, ç'astot in drole d'anivêre, i n'avot jamwês ène idée coume èn'ôte. Su la tiêsse, il avot toudi in ptit calot d'couleûr et, al manière k'i l' pwârtot, les djans l'avint loumé « **l'èvèke** » et l' soubricot lî è d'mèré.

I passot dins les viadjes toudi à pô près âs min.mes sêzons et, s'il avot tôrdjî in pô, les djans s'dijint d'yink à l'ôte :

—Vous n'ôz nin co vu l'èvèke avâ-la ?

Cand il arivot dins in viadje, i criyot : « Savates, savates, vla l' sav'tî ! » et les djans lî apwârtint leus solés à r'fwêre û don bin les z-ôtes bricoles ku dj'ans dit à c'minçant.

Pou z-arandjî les afwêres, il avot marié ène mwêje fame, mèchante coume ène rougne (c'è co arivé à dz-ôtes): la Titine, k'on la loumot. On djot d'lîe k'ile avot ène langue à 36 toûrnants, et c'ère bin vrê.

Dju va v'raconter yène du ses cures.

La Titine alot lâver les cayèts des djans al fontin.ne, avu cate, cink parèyes à lîe.

Ôr, tout l'monde sét bin k'al fontin.ne, lès langues vont souvint mî k' les palètes. Du ç'timps-la, toutes les fames alint lâver al fontin.ne et c'est al cîe k'ârot l'choûr la prêmîre. I gn'avot ki passint la nute pou z-awè l'êwe ô matin.

In djoû don, la Titine avot ène lèchive à fwêre et pou z-èsse chûre d'awè l'êwe à matin, ile su lûve duvant l'djoû pou z-alér aprêter l'batch al fontin.ne, pîs ile vint su r'coutchî ène èure, à ratindant k'i fwêje clér'.

Duvè cink eûres, ile apougne la berwète avu deus grosse rèspées du furlokes à laver et s' amon.ne toute frantche dulé l'bî, cand il tume barbe à barbe avu la servante du curé. Jujèz dul prise du bec ki gn'è yu !

—Choûte, Titine, dj'ê arivé la prêmîre et l'batch est d'à mène. Tu r'vanrès pu târd.

—Jamwês d'la vîe, churmint, k'il ruspond la Titine à s'rucrèstichant, dju n' m'ê nin lvé à 3 eûres à matin pour v'nu aprètér la fontin.ne pour vous. Lu choûr est d'a mène et dju l'wåde !

Pîs, ile su ravize :

—Mês, on put s'arandjî ! Lu batch est lôdje, dju mètrê mes cayèts avu les vôs ; on les r'counirè toudi bin.

—Vous n'î sondjèz nin chûrmint, mète vôs niches cayèts avu les cîs d' Mossieu l'Curé, des sakés twârchons tout rapiç'tés !

Et à mètant les pougnes su les hantches, ile cumince à glawinér tant' et plus.

Mês, il a falot d'pus k'ça pou sbarer nosse Titine.

—Nu sùjèz nin si hôtin.ne, ma bèle, mu lindje vât bin l'vô. Vous n'astez jamwês k' la servante dou curé. Mi, à mwins, dju coûtche avu l'èvèke !

L'ôte n'è pu yu k'à prinde ses clikes et ses clakes et ratinde ku l'choûr suje libe.

Èn' ôte djoû, lu Crolé du Rousse toûrnot Rotchôt pou r'fwêre les solés. I criyot coume toudis: Savates, savates ...

Or, i s' fwêt ku l'côp du d'vant, il avot lanci des lawes sul curé; et ça lî avot ruv'nu às orèyes, ou curé, fwârt grochîes, bin chûr, coume tous les ragots. Lu curé ratindot don l'èvèke. Et cand i l'è oyu lignî d'à lon, il è rèchu du prèsbîtère pou z-alér vèy cè k'l'ôte avot volu dire lu côp du d'vant.

Mês l'èvèke nu l'è nin atindu du çt' orèye-là et ils ont cmincî à s' les dire toutes. Ça è atiré les vèjins et gn'è bintot yu du monde su la vôye pou choûter la margaye. Pou fini, il è falu prinde dès tèmwins pou les duspârtu.

Et vous n'savèz nin les kès k'ils ont sté kêre; èh bin, lu Bon Dju d'Corbion et l'Djâbe du Vivy.*(sobriquets réels)*.

Câzèz z-à in pô cand z'îrîz à Rotchôt; On s'a souvint co !

Gaston LUCY

Raponti.yî pa Louwis BEDJOT lu 29 du Mèy 1997.